



**Bosna i Hercegovina**  
**Federacija Bosne i Hercegovine**  
**Kanton Sarajevo**  
**Javna ustanova**  
**SREDNJOŠKOLSKI CENTAR VOGOŠĆA**

Broj: 720 /23

Datum, 28.04.2023. godine

Na osnovu člana 143. Zakona o srednjem obrazovanju („Službene novine Kantona Sarajevo“ broj 23/17, 30/19, 33/21) te člana 161. Pravila JU Srednjoškolski centar Vogošća, člana 24. i člana 57. Zakona o bibliotečkoj djelatnosti ("Službene novine Kantona Sarajevo" broj: 04/99), Školski odbor JU Srednjoškolski centar Vogošća je na sjednici održanoj dana 28.04.2023. godine jednoglasno donio

**ODLUKU**

**I**

Usvaja se Pravilnik o radu školske biblioteke broj : 714/23 od 28.04.2023.godine.

**II**

Odluka stupa na snagu danom donošenja.

Dostaviti

- bibliotekar škole
- oglasna ploča
- Web stranica škole
- a/a



Predsjednik Školskog odbora

Azem Hamzić, dipl. maš.ing

Na osnovu člana 24. i člana 57. Zakona o bibliotečkoj djelatnosti ("Službene novine Kantona Sarajevo" broj: 04/99), Školski odbor JU Srednjoškolski centar Vogošća, na sedamnaestoj sjednici održanoj dana 28.04.2023.god. donosi:

## **PRAVILNIK O RADU ŠKOLSKE BIBLIOTEKE JU SREDNJOŠKOLSKI CENTAR VOGOŠĆA**

### **I OPĆE ODREDBE**

#### **Član 1.**

##### **(Predmet Pravilnika)**

(1) Pravilnikom o radu školske biblioteke (u daljem tekstu: Pravilnik) uređuje se struktura i način rada školske biblioteke u Javnoj ustanovi Srednjoškolski centar Vogošća (u daljem tekstu: Škola).

(2) Pravilnikom se uređuje sljedeće:

- a) djelatnost biblioteke;
- b) radno vrijeme biblioteke i rad bibliotekara;
- c) bibliotečki fond i nabavka bibliotečke građe;
- d) posuđivanje i korištenje bibliotečke građe;
- e) zaštita i čuvanje građe u biblioteci;
- f) druga pitanja utvrđena Zakonom o bibliotečkoj djelatnosti i drugim općim aktima

#### **Član 2.**

##### **(Značenje pojmova)**

(1) U okviru ovog Pravilnika pojedini pojmovi imaju sljedeće značenje:

- a) **"bibliotečka djelatnost"** obuhvata: sistematsko prikupljanje, stručnu obradu, čuvanje, pohranjivanje i davanje na korišćenje bibliotečke građe, prikupljanje informacija o toj građi, kao i obavezno dostavljanje štampanog materijala.
- b) **"bibliotečka građa"** obuhvata: knjige, brošure, časopise, novine, separate, disertacije, kataloge, prospekte, plakate, štampane letke, kartografske publikacije, standarde, patente, muzička djela, reprodukcije likovnih djela, razglednice, kalendare, fotografije, mikrofilmove, dijamikrokartice, gramofonske ploče, tonske kasete, videokasete, magnetofonske i magnetne trake, diskove, rukopise i drugu građu namijenjenu bibliotečkoj djelatnosti.

c) **“štampani materijal”** podrazumijeva bibliotečku građu i svaki drugi materijal namijenjen javnosti koji je izrađen na štamparskoj mašini ili umnožen nekim drugim mehaničkim, hemijskim ili elektronskim putem.

(2) Terminološko korištenje muškog ili ženskog roda podrazumijeva uključivanje oba roda.

## **II DJELATNOST BIBLIOTEKE**

### **Član 3.**

#### **(Osnovna djelatnost biblioteke)**

Osnovna djelatnost biblioteke obuhvata:

- a) utvrđuje potrebe, prikuplja, stručno obrađuje, čuva i obnavlja bibliotečku građu;
- b) vodi kataloge i drugu dokumentaciju o bibliotečkoj građi;
- c) vodi evidenciju o bibliotečkoj građi, o korisnicima i korištenju bibliotečke građe i vrši statističku obradu evidentiranih podataka;
- d) saraduje sa drugim školskim bibliotekama;
- e) učestvuje u međubibliotečkoj pozajmnici bibliotečke građe;
- f) vrši druge djelatnosti određene zakonom i drugim općim aktima, kao i međunarodnim standardima za biblioteke.

### **Član 4.**

#### **(Sporedna djelatnost biblioteke)**

U okviru svoje djelatnosti, biblioteka može:

- a) organizovati izložbe bibliotečke građe;
- b) organizovati stručne skupove i razgovore o stručnoj problematici;
- c) učestvovati u izdavačkoj djelatnosti škole.

### **Član 5.**

#### **(Principi rada biblioteke)**

- (1) Biblioteka radi u sastavu škole.
- (2) Biblioteka je dio nastavnog procesa, namjenjena potrebama izvođenja i unaprijeđivanja obrazovno-odgojnog rada u školi.
- (3) U školskoj biblioteci se pohranjuje, čuva, stručno obrađuje i daje na korištenje bibliotečka i nebibliotečka građa.
- (4) Uloga školske biblioteke je unaprijeđenje svih oblika i područja odgojno-obrazovnog procesa:
  - a) omogućavanje učenicima posuđivanje lektirnih i drugih knjiga koje su im potrebne u redovnom školovanju;
  - b) upoznavanje učenika s različitim izvorima informacija i poticanje na korištenje;
  - c) omogućavanje nastavnicima i stručnim saradnicima korištenje i posuđivanje dodatnih izvora informacija potrebnih radi kvalitetnijeg izvođenja nastave i stručnog usavršavanja;

- d) poticanje korisnika da osvijeste potrebu za cjeloživotnim učenjem;
- e) upoznavanje korisnika s načinom funkcionisanja biblioteke kao višestrukog informacijskog središta;
- f) upoznavanje korisnike s načinima pronalaženja i odabiranja informacija;
- g) poticanje korisnika na služenje bibliotekom i korištenje informacija.

### **III RADNO VRIJEME BIBLIOTEKE I RAD BIBLIOTEKARA**

#### **Član 6.**

##### **(Radno vrijeme biblioteke)**

- (1) Radno vrijeme biblioteke određuje direktor Škole na početku školske godine.
- (2) Radno vrijeme biblioteke obvezno se ističe na ulaznim vratima biblioteke.
- (3) O promjenama u radu biblioteke, bibliotekar je dužan blagovremeno obavijestiti sve korisnike bibliotečkih usluga, te se navedeno prilagođava u skladu sa aktivnostima i rasporedom učenika.
- (4) Radno vrijeme podrazumijeva rad sa korisnicima, kao i rad na obradi bibliotečke građe.

#### **Član 7.**

##### **(Rad bibliotekara )**

- (1) Bibliotečku građu korisnicima posuđuje bibliotekar.
- (2) Stručne poslove bibliotečke djelatnosti obavlja lice sa odgovarajućom stručnom spremom, položenim stručnim ispitom i stručnim znanjem.
- (3) Poslovi bibliotekara utvrđeni su Pravilnikom o radu Škole, a odnose se na:
  - a) planiranje i programiranje rada biblioteke;
  - b) obnova i nabavke novih knjiga, dopuna bibliotečkog fonda i zaštita bibliotečke građe;
  - c) bibliotečko-informacijski poslovi;
  - d) podučavanje korisnika o upotrebi informacijskih izvora;
  - e) aktivno sudjelovanje u planiranju i realizaciji svakog oblika odgojno-obrazovnog rada u Školi;
  - f) aktivno sudjelovanje u planiranju i realizaciji kulturnog i javnog života Škole;
  - g) saradnja sa drugim bibliotekama, knjižarama, izdavačima, te vladinim i nevladinim organizacijama i institucijama;
  - h) saradnja sa direktorom, profesorima, stručnim i drugim saradnicima i drugim zaposlenicima Škole, učenicima, i pružanje stručne pomoći;
  - i) vrši druge poslove određene zakonom i drugim općim aktima kao i međunarodnim standardimaza biblioteke.

## **IV BIBLIOTEČKI FOND**

### **Član 8.**

#### **(Sadržaj fonda školske biblioteke)**

(1) Fond školske biblioteke sadrži:

- a) bibliotečku građu (knjige, časopise i drugu štampanu građu),
- b) nebibliotečku građu (zvučni zapisi, filmovi, podaci u digitalnom obliku).

(2) O sastavu bibliotečkog fonda (nabavka i otpis) brine se bibliotekar, vodeći računa da isti bude prilagođen iskazanim potrebama korisnika, te da bude prilagođen nastavnom planu i programu.

(3) Bibliotečka građa predviđena za posuđivanje treba biti smještena u slobodnom pristupu, a o organizaciji smještaja bibliotečke građe koja se ne posuđuje izvan biblioteke i o nebibliotečkoj građi odlučuje bibliotekar.

(4) Bibliotekar izvještava korisnike o prinovima knjiga, časopisa i ostale bibliotečke građe putem informacija na oglasnoj ploči, web stranici, putem biltena ili na drugi adekvatan način.

### **Član 9.**

#### **(Način obrade bibliotečke građe)**

(1) Biblioteka vodi inventarne knjige, u štampanom obliku i/ili u vidu baze podataka kompjuterski generisane u koju se obavezno upisuju sve prispjele knjige.

(2) Niti jedna knjiga se ne smije izdati na korištenje prije nego se inventariše, katalogizira i klasificira.

## **IV NABAVKA BIBLIOTEČKE GRAĐE**

### **Član 10.**

#### **(Način nabavke bibliotečke građe)**

Bibliotečka građa nabavlja se kupovinom, zamjenom/razmjenom i poklonom/donacijom.

## **Član 11.**

### **(Sredstva za nabavku bibliotečke građe)**

Sredstva za nabavku bibliotečke građe obezbjeđuje škola.

## **Član 12.**

### **(Ugovor o nabavci bibliotečke građe)**

Ugovor/direktni sporazum o kupovini, zamjeni/razmjeni i poklonu/donaciji bibliotečke građe sastavlja se u pisanom obliku.

## **V POSUĐIVANJE I KORIŠTENJE BIBLIOTEČKE GRAĐE**

## **Član 13.**

### **(Posuđivanje bibliotečke građe)**

(1) Bibliotečka građa (predviđena za posuđivanje izvan biblioteke) posuđuje se od početka nastavne godine do kraja mjeseca maja, a korisnici su dužni svu posuđenu građu vratiti najkasnije do kraja juna, što ne važi za profesore/nastavnike, stručne i druge saradnike, koji mogu posuđivati bibliotečku građu prije početka nastavne godine, ali nakon provedene revizije bibliotečkog fonda.

(2) Svi korisnici mogu se svakodnevno, tokom radnog vremena biblioteke, koristiti građom referentne zbirke isključivo u prostorijama školske biblioteke.

(3) Knjige iz referentne zbirke: enciklopedije, leksikoni, rječnici, bibliografije, atlas i drugo, ne smiju se iznositi izvan prostorija školske biblioteke, niti se posuđuju.

(4) Bibliotekar bez odobrenja direktora škole ne može nikoga ovlastiti da umjesto njega obavlja bibliotečki posao zaduživanja bibliotečke građe.

## **Član 14.**

### **(Korisnici usluga biblioteke)**

(1) Uslugama školske biblioteke mogu se koristiti učenici, profesori, stručni i drugi saradnici i ostali zaposlenici škole.

(2) Redovni članovi su svi redovno upisani učenici škole i svi zaposlenici škole.

(3) Učenici škole smatraju se članovima biblioteke od dana upisa do dana prestanka školovanja.

(4) Zaposlenici škole smaraju se članovima biblioteke od dana početka radnog odnosa do dana prestanka radnog odnosa.

(5) Svi redovni članovi koriste se bibliotečkim uslugama bez novčane naknade.

(6) Redovni članovi učenici mogu posuditi odjednom najviše dvije (2) knjige od kojih je jedna lektira.

(7) Vanredni učenici zadužuju bibliotečku građu, koju su dužni vratiti na vrijeme u biblioteku kao i ostali korisnici biblioteke.

#### **Član 15.**

##### **(Dostupnost bibliotečke građe)**

(1) Bibliotečka građa dostupna je svim korisnicima iz člana 14. Pravilnika.

(2) Članstvo se stiče upisom i na osnovu članske karte.

(3) Članstvo u biblioteci je besplatno.

#### **Član 16.**

##### **(Članska karta)**

(1) Članska karta za učenika mora sadržavati: lične podatke člana i razred u koji učenik ide.

(2) Članska karta za zaposlenike mora sadržavati: lične podatke člana i zanimanje.

(3) O eventualno nastalim promjenama član je obavezan obavijestiti bibliotekara.

#### **Član 17.**

##### **(Prava člana biblioteke)**

Prava člana biblioteke su sljedeća:

a) da se služi bibliotečkom građom na način i pod uvjetima predviđenim ovim Pravilnikom;

b) da se informira i konsultuje sa bibliotekarom.

#### **Član 18.**

##### **(Obaveze člana biblioteke)**

Obaveze člana biblioteke su sljedeće:

a) da čuva bibliotečku građu i vrati je u stanje u kojem je primio;

b) da se građom koristi u roku posudbe na koji je izdana;

c) da bibliotekara obavijesti o eventualnim oštećenjima ili gubitku pozajmljene građe;

d) da nadoknadi prouzrokovanu štetu;

e) da na kraju školske godine vrati udžbenike u biblioteku, ukoliko se isti zadužuju.

#### **Član 19.**

##### **(Rok posudbe bibliotečke građe)**

Učenici posuđuju knjige na rok od mjesec (trideset) dana, a zaposlenici na rok do 6 (šest) mjeseci.

#### **Član 20.**

##### **(Zabrana korištenja bibliotečke građe izvan prostorija biblioteke)**

Izvan prostorija biblioteke ne mogu se koristiti priručnici, enciklopedije, leksikoni, rječnici, bibliografski rječnici, bibliografije, atlas i sl. (referentna zbirka) i časopisi, osim kada se radi o razrednoj posudbi prema zahtjevu predmetnog nastavnika, nastavnika razredne nastave ili stručnog saradnika.

#### **Član 21.**

##### **(Povećana potražnja bibliotečke građe)**

Ako je potražnja za nekom bibliotečkom građom povećana, bibliotekar je ovlašten da prilikom posudbe skрати korisniku vrijeme korištenja određeno članom 19. ovoga pravilnika.

#### **Član 22.**

##### **(Mogućnost produženja bibliotečke građe)**

- (1) Za vrijeme ljetnog i zimskog odmora učenika propisanim školskim kalendarom, za 6 vrijeme godišnjih odmora radnika, te kada postoje opravdani razlozi, bibliotekar može korisniku produžiti vrijeme posudbe.
- (2) Opravdanost razloga iz stava (1) ovoga člana ocjenjuje bibliotekar samostalno.

#### **Član 23.**

##### **(Posudba bibliotečke građe razrednom odjeljenju)**

- (1) Razrednom odjeljenju biblioteka može posuditi bibliotečku građu (istu ili različitu) u vidu pismenog zahtjeva nastavnika razredne nastave ili stručnog saradnika i to se smatra razrednim posuđivanjem. Ovako zadužene knjige korisnik ne smije dalje posuđivati učenicima na kućnu upotrebu.
- (2) Kad profesor/nastavnik pošalje učenika da posudi bibliotečku građu u njegovo ime, učenik mora predočiti pismeni zahtjev profesora/nastavnika ( naziv knjige, datum, potpis), u protivnom građa se ne izdaje učeniku. Za tako posuđene knjige zadužuje se profesor/nastavnik i on odgovara za iste.
- (3) Vrijeme i način posudbe građe kao i rok vraćanja građe iz stava (1) ovoga člana određuje bibliotekar u dogovoru s nastavnikom razredne nastave ili stručnim saradnikom u skladu sa sadržajima nastavnog plana i programa koji se izvode u razredu uz pomoć posuđene bibliotečke građe.



#### **Član 24.**

##### **(Pravovremeno vraćanje bibliotečke građe)**

- (1) Korisnici su posuđenu bibliotečku građu dužni pravovremeno vratiti te čuvati je od svakog oštećenja. Korisnici su dužni vratiti građu isključivo bibliotekaru na pult za razduživanje, ni u kom slučaju na police ili neko drugo mjesto. Korisnici zadužuju građu samo lično u svoje ime a ne mogu posuđivati za druge korisnike.
- (2) Ako korisnik zbog bolesti ili drugoga objektivnog razloga nije u mogućnosti pravovremeno vratiti posuđenu bibliotečku građu, dužan je o tome obavijestiti bibliotekara, a posuđenu bibliotečku građu vratiti odmah nakon prestanka razloga spriječenosti.

#### **Član 25.**

##### **(Način nadoknade oštećene/izgubljene knjige)**

- (1) Korisnici su dužni čuvati bibliotečku građu od svakoga oštećenja
- (2) U slučaju da korisnik knjigu izgubi ili ošteti tako da se više ne može koristiti, dužan je biblioteci dostaviti novi istovjetni primjerak knjige ili drugi primjerak u dogovoru sa bibliotekarom.
- (3) Za štetu iz prethodnog stava koju učini učenik, odgovoran je roditelj odnosno staratelj učenika.

#### **Član 26.**

##### **(Posudba građe drugim bibliotekama)**

Drugim samostalnim bibliotekama ili bibliotekama u sastavu drugih institucija, školska biblioteka može posuđivati bibliotečku građu samo na temelju dogovora ili ugovora o međubibliotečkoj posudbi.

#### **Član 27.**

##### **(Ovlašćenje drugog lica za posudbu građe)**

- (1) Bibliotekar ne može nikoga ovlastiti da umjesto njega obavlja bibliotečki posao posudbe knjiga.
- (2) Direktor škole može, na kraći period, ovlastiti nekog od nastavnika škole da obavlja bibliotečki posao posudbe knjiga ukoliko je bibliotekar spriječen.

#### **Član 28.**

##### **(Dužnost povrata građe prije odlaska učenika/radnika)**

- (1) U slučaju da se učenik ispisao, napustio, prešao u drugu školu ili završio školovanje, razrednik je dužan provjeriti je li vratio sve posuđene knjige u školsku biblioteku.
- (2) Radnici kojima je prestao radni odnos dužni su vratiti svu posuđenu bibliotečku građu.

#### **Član 29.**

##### **(Ponašanje u biblioteci)**

- (1) U prostorijama biblioteke mora biti uspostavljen red i mir.

(2) Korisnici biblioteke su dužni poštivati pravila lijepog i kulturnog ponašanja, te držati se odredbi Pravilnika o kućnom redu.

(3) Korisnika koji narušava red i mir, bibliotekar je ovlašten udaljiti iz prostorija biblioteke.

## **VI ZAŠTITA I ČUVANJE GRAĐE U BIBLIOTECI**

### **Član 30.**

#### **(Zaštita bibliotečke građe)**

(1) Bibliotekar je dužan osigurati bibliotečku građu pravilnim smještajem i ispravnim postupanjem, kako u biblioteci, tako i izvan nje, što obuhvaća reviziju s otpisom, uvezivanje i popravljanje.

(2) Bibliotekar je obavezan štititi građu od uzročnika propadanja (vlage, prekomjernog sunčevog ili umjetnog svjetla, atmosferskih uticaja i onečišćenja, te odstupanja od optimalne temperature).

(3) Zaštita knjižne građe od strane bibliotekara naročito podrazumijeva: reviziju bibliotečke građe, otpis knjiga, uvez i popravak građe.

(4) Korisnici su dužni čuvati bibliotečku građu od svakog oštećivanja.

(5) Korisnici ne smiju trgati listove knjiga, podcrtavati dijelove knjiga, izrezivati slike prljati knjige i sl.

(6) Niko nema pravo otuđivati (prisvajati, poklanjati, prodavati) bibliotečku građu, bilo u svoje ime, bilo u ime Škole ili drugih škola, ustanova, institucija i slično.

### **Član 31.**

#### **(Revizija bibliotečke građe)**

(1) Revizijom bibliotečke građe u školskoj biblioteci utvrđuje se stanje na policama i biblioteci u cjelini, te osigurava čuvanje i zaštita bibliotečke građe.

(2) Reviziju iz stava (1) provodi Komisija koju imenuje direktor Škole i koja je obavezna o svom radu podnijeti izvještaj.

(3) Za vrijeme revizije biblioteka je zatvorena za korisnike, građa se ne posuđuje, a može se vratiti ako nije vraćena na vrijeme.

(4) Revizija se vrši u vrijeme školskog raspusta.

**Član 32.**  
**(Način provođenja revizije)**

- (1) Revizija i otpis provode u skladu sa odredbama pozitivnih propisa Pravilnika o reviziji i otpisu bibliotečke građe, te Zakona o bibliotečkoj djelatnosti.
- (2) Istrošene knjige se otpisuju ili popravljaju, zastarjele knjige se otpisuju.
- (3) Otpisuju se dotrajale i neupotijebljive knjige koje mjerama tehničke zaštite ne mogu da se dovedu u stanje za dalje korištenje, neaktuelne knjige, nevraćene knjige duže od 2 (dvije) godine i izgubljene knjige (otuđene ili nestale bez zaduženja).
- (4) Otpisanu građu treba nadoknaditi nabavkom nove građe.

**VII PRIJELAZNE I ZAVRŠNE ODREDBE**

**Član 33.**  
**(Isticanje Pravilnika)**

Jedan primjerak ovoga Pravilnika trajno mora biti istaknut na vidljivom mjestu u biblioteci.

**Član 34.**  
**(Stupanje na snagu Pravilnika)**

Ovaj pravilnik stupa na snagu danom donošenja i objavit će na oglasnoj ploči i službenoj web stranici Škole.

**Član 35.**  
**(Izmjene i dopune Pravilnika)**

Izmjene i dopune ovog Pravilnika vršit će se po postupku za njegovo donošenje.

Broj: 714/23



PREDSJEDNIK ŠKOLSKOG ODBORA:

Azem Hamzić, dipl.maš.ing.